

四庫全書

史部

欽定四庫全書總目卷七十一

史部二十七

地理類四

遊城南記一卷

編修注如藻家藏本

宋張禮撰禮字茂中浙江人元祐元年與其友楚人陳微明遊長安城南訪唐代都邑舊址因作此記而自爲之注凡門坊寺觀園囿村墟及前賢遺迹見於載籍者叙錄甚備如嘉話錄載慈恩寺題名始於張莒禮則引唐登科記謂進士中有大中

十三年及第之張台而無張莒又長安志載章敬寺本魚朝恩莊後爲章敬皇后立寺故以爲名禮則以宋代寺基與志所載地理不同而疑其已非古址皆能據所目見而考辨之其徵据頗爲典核所列金石碑刻名目亦可與集古錄諸書互相叅証每條下間有續注不知何人所增中有金代年號其薦福寺一條又有辛卯遷徙之語案辛卯爲金哀宗正大八年史載是年四月元兵克鳳翔兩行省棄京兆遷居民於河南所云遷徙當卽此事

蓋金末元初人也

河朔訪古記二卷

永樂大典本

不著撰人名氏明焦竑國史經籍志著錄亦不云

誰作考元劉仁本羽庭集有是書序曰今翰林國

史院編修官郭囉洛氏納新

案郭囉洛原作葛邏祿納新原作迺賢今

改易之自其先世徙居鄆至正五年挈行李出浙

渡淮溯大河而濟歷齊魯陳蔡晉魏燕趙之墟弔

古山川城郭邱陵宮室王霸人物衣冠文獻陳迹

故事暨近代金宋戰爭疆場更變者或得於圖經

地志或聞諸故老舊家流風遺俗一皆考訂夜還
旅邸筆之於書又以其感觸興懷慷慨激烈成詩
歌者繼之總而名曰河朔訪古記凡一十六卷云
云則此書實納新作焦氏考之未審序稱十六卷
焦氏作十二卷亦誤也納新族出西北郭囉洛因
以爲氏郭囉洛者以

欽定西域圖志考之卽今塔爾巴哈台也元時色目諸
人散處天下故納新寓居南陽後移於鄆縣初辟
爲浙東東湖書院山長以薦授翰林編修官出叅

桑戩實哩

原作桑前失里今改正

軍事卒於軍所著金臺集

尙有刊本惟此書久軼今散見永樂大典中者惟一百三十四條所紀皆在真定河南境內而其餘不存又仁本所稱繼以詩歌者亦不復可見然據今所存諸條其山川古蹟多向來地志所未詳而金石遺文言之尤悉皆可以爲考証之助謹彙而編之核其道里疆界各以類從真定路爲一卷河南路爲一卷仍錄劉仁本原序冠之雖殘缺之餘十存一二而崖畧宛在條理可尋講輿地之學者

猶可多所取資焉

徐霞客遊記十二卷

兩江總督
採進本

明徐宏祖撰宏祖江陰人霞客其號也少負奇氣年三十出遊攜一襆被遍歷東南佳山水自吳越之閩之楚北歷齊魯燕冀嵩維登華山而歸旋復由閩之粵又由終南背走崑崙訪恒山又南過大渡河至黎雅尋金沙江從瀾滄北尋盤江復出嘉峪關數千里窮星宿海而還所至輒爲文以志遊蹟沒後手稿散逸其友季夢良求得之而中多闕

失宜興史氏亦有抄本而譌異尤甚此則楊名時所重加編訂者也第一卷自天台雁蕩以及五臺恒華各爲一篇第二卷以下皆西南遊記凡二十五篇首浙江江西一篇次湖廣一篇次廣西六篇次貴州一篇次雲南十有六篇所缺者一篇而已自古名山大澤秩祀所先但以表望封圻未聞品題名勝逮典午而後遊迹始盛六朝文士無不托興登臨史冊所載若謝靈運居名山志遊名山志之類撰述日繁然未有累牘連篇都爲一集者宏

祖耽奇嗜僻刻意遠遊既銳於搜尋尤工於摹寫
遊記之夥遂莫過於斯編雖足跡所經排日紀載
未嘗有意於爲文然以耳目所親見聞較確且黔
滇荒遠輿志多疎此書於山川脈絡剖析詳明尤
爲有資考證是亦山經之別乘輿記之外篇矣存
茲一體於地理之學未嘗無補也

右地理類游記之屬三部十五卷皆文淵閣著錄

佛國記一卷

內府藏本

宋釋法顯撰杜佑通典引此書又作法明蓋中宗

諱顯唐人以明字代之故原註有國諱改焉四字也法顯晉義熙中自長安遊天竺經三十餘國還到京與天竺禪師叅互辨定以成是書胡震亨刻入秘冊函中從舊題曰佛國記而震亨附跋則以爲當名法顯傳今考酈道元水經注引此書所云於此順嶺西南行十五日以下八十九字又引恒水上流有一國以下二百七十六字皆稱曰法顯傳則震亨之說似爲有據然隋志雜傳類中載法顯傳二卷法顯行傳一卷不著撰人地理類載佛

國記一卷註曰沙門釋法顯撰一書兩收三名互見則亦不必定改法顯傳也其書以天竺爲中國以中國爲邊地蓋釋氏自尊其教其誕謬不足與爭然六朝舊笈流傳頗久其叙述古雅亦非後來行記所及存廣異聞亦無不可也書中稱宏始三年歲在己亥案晉書姚萇宏始二年爲晉隆安四年當稱庚子所紀較前差一年然晉書本紀載趙石虎建武六年當咸康五年歲在己亥而金石錄載趙橫山李君神碑及西門豹祠殿基記乃均作

建武六年庚子復後差一年蓋其時諸國紛爭或踰年改元或不踰年改元漫無定制又南北隔絕傳聞異詞未可斷史之必是此之必非今仍其舊文以從闕疑之義焉

大唐西域記十二卷

浙江鮑士恭家藏本

唐釋元奘譯辨機撰元奘事蹟具舊唐書列傳晁公武讀書志載是書作元奘撰不及辨機鄭樵通志藝文畧則作大唐西域記十二卷元奘撰西域記十二卷辨機撰又分爲兩書惟陳振孫書錄解

題作大唐三藏法師元奘譯大總持寺僧辨機撰
與今本合考是書後有辨機序畧云元奘法師以
貞觀三年褰裳遵路杖錫遐征薄言旋軻謁帝洛
陽肅承明詔載令宣譯辨機爲大總持寺弟子撰
斯方志則陳氏所言爲得其實矣昔宋法顯作佛
國記其文頗畧唐書西域列傳較爲詳核此書所
序諸國又多唐書所不載則史所錄者朝貢之邦
此所記者經行之地也讀書志載有元奘自序此
本佚之惟前有尙書左僕射燕國公張說序後有

辨機自序句下間有註文或曰唐言某某或曰某
印度境疑爲原註又有校正譯語云舊作某某訛
者及每卷之末附有音釋疑爲後人所加第十一
卷僧伽羅國條中有明永樂三年太監鄭和見國
王阿烈苦奈兒事是今之錫蘭山卽言之僧伽羅
國也至祈福民庶作無量功德共三百七十字亦
註者附記之語吳氏刊本誤連入正文也所列凡
一百三十八國中摩揭陀一國釐爲八九兩卷記
載獨詳所述多佛典因果之事而舉其地以實之

晁公武讀書志稱元奘至天竺求佛書因記其所歷諸國凡風俗之宜衣服之制幅幘之廣隘物產之豐嗇悉舉其梗概蓋未詳檢是書特姑據名爲說也我

皇上開闢天西咸歸版籍

欽定西域圖志徵實傳信凡前代傳聞之說一一釐正此書侈陳靈異尤不足稽然山川道里亦有互相證明者姑錄存之備參考焉

宣和奉使高麗圖經四十卷

兩淮馬裕家藏本

宋徐兢撰兢字明叔號自信居士是書末附其行狀稱甌寧人文獻通考則作和州歷陽人思陵翰墨志又作信州徐兢似當以行狀爲確通考又稱兢爲鉉之裔自題保大騎省世家考王銍默記稱徐鉉無子惟錯有後居攝山前開茶肆號徐十郎鉉錯誥勅尙存則通考亦悞傳也據兢行狀宣和六年高麗入貢遣給事中路允廸報聘兢以奉議郎爲國信使提轄人船禮物官因撰高麗圖經四十卷還朝後詔給札上之召對便殿賜同進士出

身擢知大宗正事兼掌書學後遷尙書刑部員外郎其書分二十八門凡其國之山川風俗典章制度以及接待之儀文往來之道路無不詳載而其自序尤拳拳於所繪之圖此本但有書而無圖已非完本然前有其姪戴題詞一首稱書上御府其副藏家靖康丁未兵亂失之後從醫者得其本惟海道二卷無恙又述兢之言謂世傳其書往往圖亡而經存欲追畫之未果就乃以所存者刻之澠江郡齋周輝清波雜志亦稱兢仿元豐中王雲所

撰雜林志爲高麗圖經物圖其形事爲其說蓋徐

素善丹青也宣和末老人在歷陽

案此老人字疑爲先人之訛蓋

指其父邦彥也

雖得見其書但能抄其文畧其繪事乾道

中刊於江陰郡齋者卽家間所傳之本圖亡而經

存蓋兵火後徐氏亦失元本云云是宋時已無圖

矣又張世南游宦記聞曰高麗是年有請於上願

得能書者至國中於是以徐兢爲國信使禮物官

則兢之行特以工書遣而留心記載乃如是今其

篆書無一字傳世惟此編僅存考魏了翁鶴山集

稱競篆於說文解字以外自爲一家雖其名競字見於印文者亦與篆法不同云云則其篆乃滅裂古法者宜不爲後人所藏弄然此編已足以傳競雖不傳其篆可也

諸蕃志二卷

永樂大典本

宋趙汝适撰汝适始末無考惟據宋史宗室世系表知其爲岐王仲忽之元孫安康郡王士說之曾孫銀青光祿大夫不柔之孫善待之子出於簡王元份房上距太宗八世耳此書乃其提舉福建路

市舶時所作於時宋已南渡諸蕃惟市舶僅通故
所言皆海國之事宋史外國列傳實引用之核其
叙次事類歲月皆合但宋史詳事蹟而畧於風土
物產此則詳風土物產而畧於事蹟蓋一則史傳
一則雜誌體各有宜不以偏舉爲病也所列諸國
賓瞳龍史作賓同隴登流眉史作丹流眉阿婆羅
拔史作阿蒲羅拔麻逸史作摩逸蓋譯語對音本
無定字龍隴三聲之通登丹蒲婆麻摩雙聲之轉
呼有輕重故文有異同無由核其是非今亦各仍

其舊惟南宋僻處臨安海道所通東南爲近志中
乃兼載大秦天竺諸國似乎隔越西域未必親覩
其人然考冊府元龜載唐時祇教稱大秦寺程史
所記廣州海獠卽其種類又法顯佛國記載陸行
至天竺附商舶還晉知二國皆轉海可通故汝适
得於福州見其市易然則是書所記皆得諸見聞
親爲詢訪宜其叙述詳核爲史家之所依據矣

溪蠻叢笑一卷

編修程晉
芳家藏本

宋朱輔撰輔字季公桐鄉人不詳其仕履惟虎邱

志載所作咏虎邱詩一首知爲南宋末人耳溪蠻
者卽後漢書所謂五溪蠻章懷太子註稱武陵有
雄溪櫛溪酉溪澠溪辰溪悉是蠻夷所居故謂五
溪蠻今在辰州界者是也輔蓋嘗服官其地故據
所見聞作爲是書所記諸蠻風土物產頗備如闌
干布之傳於漢代三脊茅之出於包茅山數典亦
爲詳贍至其俗尙之異種類之別曲折纖悉臚列
明晰事雖鄙而詞頗雅可謂工於敘述用資考證
多益見聞固不容以瑣屑廢焉

真臘風土記一卷

浙江范懋柱家天一閣藏本

元周達觀撰達觀温州人真臘本南海中小國爲扶南之屬其後漸以強盛自隋書始見於外國傳唐宋二史並皆紀錄而朝貢不常至故所載風土方物往往疎略不備元成宗元貞元年乙未遣使招諭其國達觀隨行至大德元年丁酉乃歸首尾三年諳悉其俗因記所聞見爲此書凡四十則文義頗爲賅贍惟第三十六則內記瀆倫神譴一事不以爲天道之常而歸功於佛則所見殊陋然元

史不立真臘傳得此而本末詳具猶可以補其佚
闕是固宜存備叅訂作職方之外紀者矣達觀作
是書成以示吾邱衍衍爲題詩推挹甚至見衍所
作竹素山房詩集中蓋衍亦服其敘述之工云

島夷志略一卷

浙江范懋柱家
天一閣藏本

元汪大淵撰大淵字煥章南昌人至正中嘗附賈
舶浮海越數十國紀所聞見成此書今以明馬觀
瀛涯勝覽互勘如觀所稱占城之人頂三山金花
冠衣皆縈綵帨產伽南香觀音竹降真香之屬瓜

哇之廝村沽灘新村蘇馬魯隘港口諸處風俗各異又其國人有三等其土產有白芝蔴綠豆蘇木金剛子白檀肉荳蔻龜筒玳瑁紅綠鸚鵡之屬舊港有火鷄神鹿之屬皆爲此書所未載又所載真臘風土記亦僅十之四五蓋殊方絕域偶一維舟斷不能周覽無遺所見各殊則所記各別不足異也至云瓜哇卽古闍婆考明史明太祖時瓜哇闍婆二國並來貢其二國國王之名亦不同大淵併而爲一則傳聞之悞矣然諸史外國列傳秉筆之

人皆未嘗身歷其地卽趙汝适諸蕃志之類亦多得於市舶之口傳大淵此書則皆親歷而手記之究非空談無徵者比故所記羅衛羅斛針路諸國大半爲史所不載又於諸國山川險要方域疆里一一記述卽載於史者亦不及所言之詳錄之亦足資考證也考黃虞稷千頃堂書目及焦竑國史經籍志皆不載是書唯錢曾讀書敏求記載之稱爲元人舊鈔本則此書久無刊板傳播殊稀又稱至正年間河東張翥三山吳鑒爲之序今考此本

二人之序俱存然吳鑒序乃有二篇前一篇題至正己丑乃此書原序後一篇題至正十一年在前序後二年乃所作清源續志之序悞入此書蓋吳鑒修志之時以泉州爲海道所通賈船所聚因附刊此書於志末摘錄者併志序鈔之也又有嘉靖戊申袁袞跋頗議其漏載日本蓋未悉大淵此書惟紀所見非海國全志云

朝鮮賦一卷

浙江范懋柱家天一閣藏本

明董越撰越字尙矩寧都人成化己丑進士官至

南京工部尙書諡文僖孝宗卽位越以右春坊右庶子兼翰林院侍講同刑部給事中王儼使朝鮮因述所見聞以作此賦又用謝靈運山居賦例自爲之註所言與明史朝鮮傳皆合知其信而有徵非鑿空也考越自正月出使五月還朝留其地者僅一月有餘而凡其土地之沿革風俗之變易以及山川亭館人物畜產無不詳錄自序所謂得於傳聞周覽與彼國所具風俗帖者恐不能如是之周匝其亦奉使之始預訪圖經還朝以後更徵典

籍叅以耳目所及以成是製乎越有文僖集四十
二卷今未見其本又別有使東日錄一卷亦其往
返所作詩文不及此賦之典核別本孤行此一卷
固已足矣

海語三卷

浙江鄭大節家藏本

明黃衷撰衷字子和南海人宏治丙辰進士官至
兵部右侍郎是書乃其晚年致政家居就海洋番
舶詢悉其山川風土裒錄成編自序稱鐵橋病叟
者其別號也廣東通志載是書作一卷此本實三

卷分爲四類曰風俗凡二目曰物產凡二十九目
曰畏途凡五目曰物怪凡八目所述海中荒忽奇
譎之狀極爲詳備然皆出舟師舵卒所親見非山
海經神異經等純構虛詞誕幻不經者比每條下
間附論斷詞致高簡時寓勸戒亦頗有可觀書中
別有附註乃其族子學準增加原本所載今併存
焉案明史滿刺加傳稱正嘉間爲佛郎機所滅而
此書則稱佛郎機破其國王退依陂隄里佛郎機
整衆而去王乃復所云云與史稍有不同此書成

於嘉靖初海賈所傳見聞較近似當不失其實是
尤可訂史傳之異不僅博物之資矣

東西洋考十二卷

江蘇巡撫
採進本

明張燮撰燮字紹和龍溪人萬歷甲午舉人考明
史黃道周傳載其三罪四耻七不如疏在崇禎十
八年距燮鄉薦之時已四十四年尙稱志尙高雅
博學多通不如龍溪舉人張燮則燮以舉人終於
家也是書成於萬歷丁巳仿宋趙汝适諸蕃志例
惟載海國之通互市者首西洋考凡十五國又附

錄者四次東洋考凡七國又附錄者十二次外紀
考爲日本及紅毛番不通貢市故別著之次稅餉
考分水編陸編職官公署四子目次舟師考分內
港水程二洋針路祭祀占驗水醒水忌定日惡風
潮汐七子目次稅璫考紀神宗時內官高竄通番
蠹國劫官擾民始末最詳次藝文次逸事考其例
於交趾占城暹羅彭亨呂宋蘇祿名與古同者仍
用古名他若瓜哇之爲下港東埔塞之爲真臘大
泥之爲勃泥舊港之爲三佛齊麻六甲之爲滿刺

加啞齊之爲蘇門荖刺思吉港之爲蘇吉丹遲悶
之爲吉里地間文萊之爲婆羅猫里務之爲合猫
里則並從新名使通俗易檢每國先列沿革事蹟
多與諸史相出入如占城卽古林邑而五代史以
爲自古未通之類亦頗有改正大致與明一統志
畧同而稍益以諸書如閩部疏之誤記燕窩菜及
小葛羅誤稱吉蘭丹之類咸附辨之次列海船交
易之例則皆采自海師賈客之口爲傳記之所未
詳其稅璫一篇言利弊最悉水程針路諸篇尤切

於實用惟明代控制外番至爲無術無事則百計以漁利有變則委曲以苟安事事可爲烟戒而篇末諸論乃稱功頌德曲筆實多蓋當時臣子之詞置而不論可矣

職方外紀五卷

兩江總督採進本

明西洋人艾儒畧撰其書成於天啟癸亥自序謂利氏賁進萬國圖誌龐氏奉命翻譯儒畧更增補以成之蓋因利瑪竇龐我廸舊本潤色之不盡儒畧自作也所紀皆絕域風土爲自古輿圖所不載

故曰職方外紀其說分天下爲五大州一曰亞細亞州其地西起那多理亞離福島六十二度東至亞尼俺峽離福島一百八十度南起瓜哇在赤道南十二度北至冰海在赤道北七十二度二曰歐邏巴州其地南起地中海北極出地三十五度北至冰海北極出地八十餘度經一萬一千二百五十里西起西海福島初度東至阿北河距福島九十二度經二萬三千里三曰利未亞州西南皆至利未亞海東至西紅海北至地中海極南南極出

地三十五度極北北極出地三十五度東西廣七十八度四曰亞墨利加地分南北中路一峽峽南之地南起墨瓦蠟泥海峽南極出地五十二度北至加納達北極出地十度半西起福島二百八十六度東至三百五十五度峽北之地南起加納達南極出地十度半北至冰海其北極出地度數則未之測量西起福島一百八十度東盡三百六十六度五曰墨瓦蠟泥加則彼國與之初通疆域道里尙莫得詳焉前冠以萬國全圖後附以四海總說

所述多奇異不可究詰似不免多所夸飾然天地之大何所不有錄而存之亦足以廣異聞也

赤雅三卷

浙江巡撫採進本

明鄭露撰露字湛若南海人鈕琇觚賸載其爲諸生應歲試時題爲文行忠信乃四比立格以真草隸篆四體書之坐是被斥蓋亦放誕之士王士禛池北偶談又載其少游金陵客阮大鍼之門嘗爲大鍼作集序大鍼亦爲露作集序其人殊不足重

迨

國朝順治初

王師入粵露義不收節竟抱平生所寶古琴不食而死士
禎詩所謂南海畸人死抱琴者卽爲露作其志節
乃爲世所稱然露託契閻兒所作嶠雅屢稱大鉞
爲石巢夫子實貽譏於名教後雖晚蓋僅足自贖
固不能與黃淳耀等皦然日月爭光也是書乃露
遊廣西之時徧歷岑藍胡侯槃五姓土司因爲猺
女雲輶孃留掌書記歸而述所見聞所記山川物
產皆詞藻簡雅序次典核不在范成大桂海虞衡

志下可稱佳本惟中間叙岑氏獠女被服名目溪
崗中必無此綺麗露蓋據古事以文飾之又叙猩
猩一條大不近情叙木客一條既稱爲秦時採木
之人何以能作律詩所稱細雨詩劍閣鈴逾動長
門燭更深一聯何以能用漢唐故事是則附會塗
飾不免文士之積習矣

朝鮮志二卷

浙江范懋柱家
天一閣藏本

不著撰人名氏書中稱大明一統志則成於明代
也卷首略叙疆域沿革而不標其目以下分六大

綱爲經曰京都曰風俗曰古都曰古迹曰山川曰樓臺以所屬八道爲緯中曰京畿西南曰忠清東南曰慶尙南曰全羅西曰黃海東曰江源西北曰平安東北曰咸鏡皆畧如中國地志惟京都但載宮殿曹署而不及城市風俗多載其國典制與故事混而爲一又諸道皆無四至八到古迹多雜以神怪頗同小說於體例皆爲未協然遺聞瑣事爲中國史書所未詳者往往而在頗足以資考證其叙述亦皆雅潔較諸州郡輿圖冗漫無緒者轉爲

勝之宋王雲嘗撰雜林志其書不傳徐兢高麗圖
經於山川古迹亦畧此書出其國人所述當不失
真我

國家

威德覃敷八紘砥屬朝鮮一國道里旣近歸化尤先雖
號藩封實同郡縣其山川疆域皆宜隸籍於職方
錄而存之亦足備輿記之一種也

皇清職貢圖九卷

乾隆十六年奉

勅撰以朝鮮以下諸外藩爲首其餘諸藩諸蠻各以所
隸之省爲次會

聖武遠揚戡定西域拓地二萬餘里河源月窟之外梯
航鱗集琛賁旅來乃增繪伊犁哈薩克布魯特烏
什巴達克山安集延諸部共爲三百餘種分圖系
說共爲七卷告成於乾隆二十二年迨乾隆二十
八年以後愛烏罕霍罕啟齊玉蘇烏爾根齊諸部
咸奉表入覲土爾扈特全部自俄羅斯來歸雲南
整欠景海諸土目又相繼內附乃廣爲續圖一卷

每圖各繪其男女之狀及其部長屬衆衣冠之別
凡性情習俗服食好尚罔不具載考南史載梁武
帝使裴子野撰方國使圖廣述懷來之盛自荒服
至海表凡二十國張彥遠歷代名畫記載梁元帝
有職貢圖史繩祖學齋佔畢引李公麟云元帝鎮
荊州作職貢圖狀其形而識其土俗凡三十餘國
其爲數較今所繪不及十分之一至山海經所載
諸國多出虛撰概不足憑漢書西域傳以下史家
所述多出傳聞核以道里山川亦往往失實又不

及今之所繪或奉贄貢篚親覲其人或仗鉞乘輅
實經其地允攝提合雒以來所未覩之隆軌然伏
讀

御題長律方以

保泰承庥殷殷咨儆此

景命所以重申

天聲所以益播也自今以往占風驗海而至者當又不
知其凡幾珥筆之臣且翹佇新圖之更續矣

謹案此書及西域圖志皆以紀

盛德昭宣無遠弗屆爲亘古之所未有西域圖志恭錄
於都會郡縣類中此則恭錄於外紀者西域
雖本外國而列戍開屯築城建邑已同內地
之一省入於都會郡縣所以著闢地之廣彰
聖武也職貢諸方多古來聲教所不及重譯所未通入
於外紀所以著格被之遠表

聖化也

坤輿圖說二卷

內府藏本

國朝南懷仁撰懷仁西洋人康熙中官欽天監監正

是書上卷自坤輿至人物分十五條皆言地之所
生下卷載海外諸國道里山川民風物產分爲五
大州而終之以西洋七奇圖說大致與艾儒畧職
方外紀互相出入而亦時有詳畧異同案東方朔
神異經曰東南大荒之中有樸父焉夫婦並高千
里腹圍案此下當有腹圍之里數原本脫佚今姑仍之自輔天初立時使
其夫婦導開百川嬾不用意謫之並立東南不飲
不食不畏寒暑須黃河清當復使其夫婦導護百
川云云此書所載有銅人跨海而立巨舶往來出

其腩下者似影附此語而作又神異經曰北方層冰萬里厚百丈有磈鼠在冰下土中焉形如鼠肉重千斤可以作脯食之已熱云云此書記此物全與相合又周密癸辛雜識曰西域有沙海正據要津其水熱如湯不可向近此天之所以限華夷也終古未嘗通中國忽一日有巨獸浮水窺其骨長數十里橫於兩涘如津梁然骨中有髓竅可容並馬於是西域之地始通中國謀往來者每以膏油塗其骨懼其枯朽而折則無復可通故耳云云此

書記此事亦全與相合疑其東來以後得見中國古書因依仿而變幻其說不必皆有實跡然核以諸書所記賈舶之所傳聞亦有厯厯不誣者蓋雖有所粉飾而不盡虛構存廣異聞固亦無不可也

異域錄一卷

兵部侍郎紀昀家藏本

國朝圖理琛撰圖理琛姓阿顏覺羅氏先世葉赫人由考取內閣中書官至兵部職方司郎中是編乃康熙五十一年五月圖理琛以原任內閣侍讀奉

命出使土爾扈特由喀爾喀越俄羅斯國至其地五十四

年三月回京師復

命因述其道里山川民風物產以及應對禮儀恭呈

御覽冠以輿圖次隨日紀載見聞其體例畧如宋人行記

但宋人行記以月日爲綱而地理附見此則以地理爲綱而月日附見所歷俄羅斯境曰楚庫柏興曰烏的柏興曰柏海爾湖曰尼爾庫城曰昂噶拉河曰伊聶謝柏興曰麻科斯科曰揭的河曰那里木柏興曰蘇爾呼忒柏興曰薩馬爾斯科曰狄木演斯科曰托波爾曰鴉班沁曰費耶爾和土爾斯

科城曰費耶爾和土爾斯科佛落克顏嶺曰索里
喀穆斯科曰改果羅多曰黑林諾付曰喀山曰西
穆必爾斯科曰薩拉托付曰塔喇斯科曰托穆斯
科曰伊里木城皆其大聚落也其地爲自古興記
所不載亦自古使節所未經如史記述匈奴北海
頗作疑詞故儒者類言無北海今據圖理琛所記
知伊聶謝柏興距北海大洋一月程又唐書稱薛
延陀夜不甚暗猶可博奕僅得之於傳聞圖理琛
以五月至其地知夏至前後確有是事皆我

聖祖仁皇帝德化覃敷

威稜震疊故輶車所至莫不具驛傳供芻糈涉越三四萬里如行閭閻故得以從容游覽見所未見聞所未聞纂述成編以補亘古黃圖所未悉今備錄其文使天下萬世知

聖化彌綸廻出於章亥所步之外且所記俄羅斯土爾扈特畏懷恭順之忱尤足見

堯天丕冒祗屬無垠凡在方趾圓顙無不鱗集仰流效誠恐後爲三五以來所未有今土爾扈特已全部內

附而所記俄羅斯南路十四國乾隆乙亥以後又已盡入版圖併以見

武烈

文謨顯承啟佑所由拓億禩之丕基者非偶然也

海國聞見錄二卷

浙江巡撫採進本

國朝陳倫炯撰倫炯字資齋同安人父昂康熙二十

一年從靖海侯施琅平定臺灣琅又使搜捕餘黨

出入東西洋五年叙功授職官至廣東副都統

案副

都統爲滿洲額缺陳昂得是官蓋出

特典

倫炯少從其父熟聞海道

形勢及襲父蔭復由侍衛歷任澎湖副將臺灣鎮
總兵官移廣東高雷廉江南崇明狼山諸鎮又爲
浙江寧波水師提督皆濱海地也故以平生間見
著爲此書上卷記八篇曰天下沿海形勢錄曰東
洋記曰東南洋記曰南洋記曰小西洋記曰大西
洋記曰崑屯記曰南澳氣記下卷圖六幅曰四海
總圖曰沿海全圖曰臺灣圖曰臺灣後山圖曰澎
湖圖曰瓊州圖凡山川之扼塞道里之遠近沙礁
島嶼之夷險風雲氣候之測驗以及外蕃民風物

產一一備書雖卷帙無多然積父子兩世之閱歷
叅稽考驗言必有徵視勦傳聞而述新奇據故籍
而談形勢者其事固區以別矣其南澳氣記中稱
萬里長沙者卽列子所謂歸墟莊子所謂尾閭抱
朴子所謂沃焦宋史琉球傳所謂落漈但諸書皆
言注之不盈倫炯則推以潮長而此溜落潮落而
此溜長知水自上入仍自下出其言確切近理足
以決千古耳食之疑又史稱舟落漈者一去不返
倫炯則謂乘潮長之時求出則外高內下反不得

出如潮落乘南風棹船尚可出雍正丙午有閩船
落際者果如其說得還此語亦前人所未發惟所
記七洲洋帶箭鳥謂由鄭和呼鳥插箭爲記以導
海舶又記暹羅鬼與鄭和鬪法夜建寺塔今尙在
焉則蕃俗信鬼有此附會之談倫炯不爲辨正是
亦少踈然是書主於記海道不主於考故實彼國
既有此說據而錄之固亦無害宏旨爾

右地理類外紀之屬十七部九十八卷皆文淵閣著
錄

欽定四庫全書總目卷七十二

史部二十八

地理類存目一

華陽宮記事一卷

浙江汪啟淑家藏本

宋僧祖秀撰祖秀蜀人靖康元年閏十一月汴京陷時隨都人避兵艮岳因記其邱壑池館之勝敘述極詳末歸其過於朱勣梁師成而推原禍本於蔡京王偁東都事畧全載之此本蓋卽從偁書錄出也

艮嶽記一卷

編修汪如藻家藏本

宋張淏撰淏有會稽續志已著錄是書取徽宗御製艮嶽記及蜀僧祖秀所作華陽宮記各摭其畧首叙朱勔擾民之事又稱越十年金人南侵臺榭官室悉皆拆毀官不能禁其大意亦與祖秀同

故宮遺錄一卷

兩淮馬裕家藏本

明蕭洵撰洵廬陵人洪武初爲工部郎中奉命毀元故宮因記其制度洵後爲湖州長興令欲刊未果其本歸於呂山高氏家洪武丙子松陵吳節從

高氏鈔傳萬厯中武進趙琦美得之以張浙門家鈔本互校因行於世其書序次典核朱彛尊曰下舊聞全載之故今不重錄焉

右地理類宮殿疏之屬三部三卷皆附存目

新定九域志十卷

浙江江啟淑家藏本

此書與宋王存等所撰元豐九域志文並相同惟府州軍監縣下多出古蹟一門詳畧失宜視原書頗爲蕪雜蓋卽晁公武讀書志所云新本朱彛尊跋以爲是民間流行之書者也首卷四京及京東

東路俱已闕次卷亦有訛脫藝尊曾見崑山徐氏家藏宋槧本所紀闕文與此本同蓋卽從徐氏錄出者張淏雲谷雜記稱南渡後閩中刻九域志誤改睦州爲嚴州今檢毛晉家影鈔九域志舊本睦字未改而此本則已作嚴州足知其出於南宋閩中刊本而古蹟一門當卽其時坊賈所增入矣王士禎居易錄載所見九域志與此本合而誤以爲卽元豐經進之書則亦未見王存原本也

歷代地理指掌圖一卷

兩淮鹽政
採進本

舊本題宋蘇軾撰始自帝嚳迄於宋代爲圖凡四十有四前有序後有總論其序云據元豐九域志然書中乃有建炎二年改江寧爲建寧府紹興三十二年升洪州爲隆興府諸語案費衮梁溪漫志曰今世所傳地理指掌圖不知何人所作其考究精詳詮次有法上下數千百年一覽而盡非博學洽聞者不能爲自足以傳遠何必托之東坡其序亦云東坡所爲觀其文淺陋乃舉子對策手段東坡安有此語最後有本朝陞改廢置州郡一圖乃

有崇寧以後迄於建炎紹興所廢置者此豈出於東坡之手哉云云則此書之僞南宋人固已言之而流傳刊本仍題軾名刊胡安國春秋傳者皆摘其列國一圖爲冠亦仍題曰東坡謬之甚矣其書雖簡明而踈畧殊甚費袞所稱殊爲過當亦不足據也

寰宇通衢一卷

內府藏本

明洪武中官撰案黃虞稷千頃堂書目曰寰宇通衢一卷洪武二十七年九月書成先是太祖以輿

地之廣不可無書以紀之乃命翰林儒臣以天下
道里之數編類爲書其方隅之目有八所言皆與
此本合

輿圖記叙二卷

江西巡撫
孫進本

明桂萼撰萼有桂文襄奏議已著錄是編卽嘉靖
八年爲大學士時所上首爲總圖次則兩京十三
省各爲一圖附以四夷圖但畧具兵馬錢糧之總
數併府州縣衛之名亦不具列所述利病亦皆敷
衍之詞其奏進疏乃稱披此圖如祖宗之親歷地

方者然世宗批荅亦稱其明白要切具見體國經濟皆不可解也

志畧十六卷

編修注如藻家藏本

明廖世昭撰世昭福建懷安人正德丁丑進士官國子監博士是書首題南京兵部武庫司刊行蓋當時官本前載周禮職方氏九州全文其後每省爲一圖而終以四裔各畧載其沿革山川人物古蹟土產舛訛缺畧殊無可觀其四裔一卷傳聞附會尤多失真地志中之最劣者也

皇輿考十二卷

副都御史黃登賢家藏本

明張天復撰天復號內山山陰人嘉靖丁未進士官至雲南按察司副使事跡附見明史文苑傳其子元怵傳中是書取闕本志畧稍加潤飾其自序云文襄桂公輿地圖志官諭念庵羅公廣輿圖司馬許公九邊論詞約而事該故往往引三家之說冠於篇端文襄桂公者桂萼念庵羅公者羅洪先司馬許公者許論也其大意在規明一統志之失但貪列人物依然挂一漏萬至若四至八到郡縣

沿革皆畧而不詳未爲善本

圖註水陸路程途八卷

浙江鮑士恭家藏本

明黃汴撰汴不知何許人是書前列南北二京及各省路途後序道路分合里數遠近其山川夷險亦言之頗詳書成於隆慶四年而猶載廣東至安南驛路蓋未棄交趾以前所設舊站亦樂史太平寰宇記載燕雲十六州之例也

郡縣釋名二十六卷

浙江鮑士恭家藏本

明郭子章撰子章有蟪衣生易解已著錄其書以

郡縣地名一一詮釋其文義文義可通則畧爲訓
詁如福州則云取百順之名永清則云取邊境永
清之類皆固陋之甚至其不可解者則置而不言
亦何取於釋名乎

目營小輯四卷

浙江鮑士恭家藏本

明陸化熙撰化熙有詩通已著錄是書以十三省
布政司爲綱而繫以所屬府州縣衛所凡土貢之
宜鹽課之增損屯田之稅鈔悉隨地詮叙至太僕
寺行太僕寺并各苑馬寺監馬數增耗及邊關堡

寨之廢置武弁員額駐屯之處多有明會典所未載者前有自序題辛酉仲夏辛酉爲天啟元年而書中永平府條下有天啟五年八月現在官兵十一萬七千八十六員名馬騾駝牛五萬三千八百五十二匹隻及所支月餉之數則序作於辛酉書成又在乙丑後矣其曰目營者自序謂取目若營四海之意蓋亦有志時務者也

輿地名勝志一百九十三卷

江蘇巡撫採進本

明曹學佺撰學佺有易經通論已著錄學佺以博

治聞著述甚富是書則由雜采而成頗無倫次時亦舛訛又多不著出典未爲善本

今古輿地圖

無卷數 江蘇巡撫採進本

不著撰人名氏首列明一統圖由明溯元層累而上至帝嚳九州凡爲圖五十又別爲古今區域總要歷代山名歷代水名辰次分野列國分野天象分野山河兩戒八圖共爲五十有八凡明郡縣用墨書而歷代沿革異同俱以五色筆界畫細註又各附說於圖中考錢曾讀書敏求記曰古今輿地

圖二卷起帝嚳九州至元末羣雄悉以明朝區域
爲總要復以朱界其間標舉歷代地理於上凡古
今山水名及一行山河兩戒咸載焉據其所言與
此本合惟曾云二卷此不分卷曾云起帝嚳九州
至元末羣雄此起元末羣雄至帝嚳九州爲小異
蓋此書本無卷數曾所藏蓋以篇頁稍繁分爲二
冊故以二卷著錄又每頁各自爲圖不相聯屬裝
潢者以時代先後叙之故始自帝嚳耳然書名今
古不名古今是自後溯前之明證圖旁亦細註某

圖第幾字則曾所藏本爲誤移其次序審矣其書
於明代郡縣不能計里開方又不能上測經緯二
度其方向皆在影響之間根柢先已不確歷代沿
革遂皆從之而移曾以謝莊左傳圖比之非其倫
也

天下郡國利病書一百二十卷

兩江總督
採進本

國朝顧炎武撰炎武有左傳杜解補正已著錄是書
蓋雜取天下府州縣志書及歷代奏疏文集並明
代實錄輯錄成編其中采掇舊文同異兼收間有

矛盾之處編次亦絕無體例蓋未成之藁本也

增訂廣輿記二十四卷

兩江總督
採進本

國朝蔡方炳撰方炳字九霞號息關崑山人明山西
巡撫懋德之子也是編因明陸應陽廣輿記而稍
刪補之大抵鈔撮明一統志無所考正自列其父
於人物中亦乖體例懋德不愧於人物宜待天下
後世記之不可出自方炳方炳自作家傳亦無不
可特不可載於輿記也

閩史津逮

無卷數 江西
巡撫採進本

國朝朱約淳撰約淳字博成餘姚人順治辛丑進士
官泰安縣知縣是書以閱史不諳地理無由識其
形勢乃考訂往牒正其舛訛各繪以圖前有自序
稱首禹貢從其朔也職方所載代有殊名作歷代
疆域圖十有一海寓仄分英雄角逐作歷代割據
圖八行臺分建元創明因作省會圖十有七玉門
西限長城北起作九邊圖十有一羌人畢至百粵
胥通作鎮番圖二鎮蠻圖三神京都燕輪將及焉
作漕河海運圖各一古河北播今通淮泗作黃河

圖一文命四敷明堂咸享作域外圖九既有省會
必詳分野作天文圖一今考其省會圖內有北直
隸南直隸等圖福建省圖尙無臺灣澎湖蓋成於
明之末年入

國朝未及改修云

歷代輿地徵信編殘本六卷

兩江總督
採進本

國朝錢邦寅撰邦寅字馭少丹徒人是編成於雍正
中前無總目不知原本卷帙幾何此所存殘稿題
曰前集自第一卷至第四卷叙歷代疆域分合第

五卷至第六卷之上半爲形勝紀畧第六卷之下
半爲水道紀畧以下則全佚焉其考據議論亦頗
博辨而脫落斷爛卽此所存之六卷已不盡可讀
矣

山河兩戒考十四卷

安徽巡撫
採進本

國朝徐文靖撰文靖有禹貢會箋已著錄星野之說
見於周禮保章氏以星土辨九州之地所封封域
皆有分星以觀妖祥鄭康成注云大界則九州州
中諸國之分域於星亦有分焉其書亡矣堪輿雖

有郡國所入度非古數也如鄭氏所言以九州爲大限而諸國地域遠於國都者其上應之星自不得盡同是星野不主列國而主乎其地漢書地理志於漢時郡縣畧著梗槩至唐而僧一行又據山河以分於義尤近然其說有云魏徙大梁則西河合於東井秦拔宜陽而上黨入於輿鬼彼此遷就益涉支離特其文辭綜博足以自達所見故後代言分野者悉宗之文靖廣採羣書以爲之註此八卷是也自卷九至卷十四則文靖所續補亦引羣

書爲之注自漢以降星野之書已亡說者徒就春秋內外傳以其所及推其所不及牽合附會皆所不免是書雖詳於考古不涉占驗然博引曲證以資談論則可於實用毫無所當也

古今約說

無卷數 兩江總督探進本

國朝邵元龍編自署曰古九峯蓋松江人其書節鈔古今輿地故實詩文排輯成編漫無體例兼有塗乙空缺處猶未完之稿也

右地理類總志之屬十七部四百三十七卷

內三部無卷數

皆附存目

欽定四庫全書總目卷七十三

史部二十九

地理類存目二

成化山西志十六卷

兩淮鹽政
採進本

不著撰人名氏考

國朝雍正甲寅宜興儲大文所纂山西志云舊志成於成化甲午督學僉事胡謐創修則此本爲胡謐所撰矣其後有嘉靖周斯盛志萬厯李維禎志皆本此志而增修者也謐四川馬湖沐川長官司人

永樂辛丑進士見太學題名碑修志之時距其登第之歲已五十四年矣

寧波府簡要志五卷

兩淮馬裕家藏本

明黃潤玉撰潤玉有四明文獻錄已著錄是編以舊志太冗乃刪除繁贅定爲是編體例簡潔亦康海武功志之亞然武功志藝文散入各類中此則僅存其篇題而文皆不錄則欲矯志乘濫載之失而未免太簡矣

成化杭州府志六十三卷

浙江范懋柱家天一閣藏本

明夏時正撰時正字季爵仁和人正統乙丑進士
官至大理寺卿是書成於成化乙未因洪武中徐
一夔志及永樂景泰續志增修分封畛山川公署
風土學校水利軍政詔赦郵政壇廟名宦科貢人
物墳墓寺觀書籍碑碣紀遺十八門所收頗冗濫
如載凌雲翰嘲析產小詞之類皆非地志之體其
凡例稱引用諸書皆簡節全文或因而足以已意
故皆不著所出其大畧可睹矣

建陽縣志四卷雜誌三卷續志一卷

兩淮馬裕
家藏本

明黃璿撰璿建陽人是書成於景泰庚午卷首於輿圖之外增以先賢畫像十二傳刻失真殆可不
必雜誌三卷亦璿所作而題曰知非子黃景衡集
景衡卽璿之字見前志劉章目錄序中蓋其書乃
修志之餘據拾佚事自同於小說家流故署其號
也續志一卷乃宏治甲子邑人袁銛所撰名繼前
志實則體例各殊

毘陵志四十卷

江蘇巡撫
採進本

明王俱撰俱字廷貴武進人景泰辛未進士官至

南京吏部尙書謚文肅是編體例頗詳整惟齊高
梁武雖從斯郡發祥然奄有江東各存國史修郡
志者但可載其軼聞舊蹟以備考徵乃於人物之
首冠以二帝附以諸王揆以斷限之法於義爲濫
蓋輿記務侈土風而不知著書各有體例也

中都志十卷

浙江范懋柱家
天一閣藏本

明柳瑛撰瑛字廷玉臨淮人天順丁丑進士官至
河南按察使僉事初明太祖吳元年改濠州爲臨
濠府洪武三年改爲中立府定爲中都立宗社建

宮室七年又改爲鳳陽此志不曰鳳陽而曰中都
用太祖制也其書成於成化丁未體例龐雜最爲
冗濫

金華府志三十卷

兩淮馬裕
家藏本

不著撰人名氏前列成化庚子商輅序稱爲知府
周宗智撰而志中乃載及隆萬時事豈後來又因
宗智之本益以近事耶宗智大冶人天順庚辰進
士

赤城新志二十三卷

浙江范懋柱家
天一閣藏本

明謝鐸撰鐸有赤城論諫錄已著錄台州自嘉定以後建置沿革宋陳耆卿志已具鐸因其體例續輯此編時台州已陞爲府又析黃巖爲太平縣故鐸爲太平人云

宏治八閩通志八十七卷

兩淮鹽政
採進本

明黃仲昭撰仲昭名潛以字行成化丙戌進士官至江西提學僉事事蹟具明史本傳其書於輿記之中較爲詳整然以戶口水利列之食貨門中則牽強不倫亦創例之未協者也

嘉興府志三十二卷

兩淮馬裕家藏本

明柳珍撰珍儀真人成化丙戌進士官嘉興府知府是編成於宏治壬子以府與所屬七縣各爲一志其例皆分二十一門序述參差詳畧失當殊未見體要

宏治湖州府志二十四卷

兩淮鹽政採進本

明王珣撰珣曹縣人成化己丑進士官至右副都御史巡撫寧夏是志乃宏治辛亥珣官湖州知府時所重修初宋談鑰嘗輯吳興志而文頗蕪陋明

景泰間訓導陳碩乃因談志續爲一編成化甲午
知府九江勞鉞又令郡人張淵補所未備增爲二
十二卷珣以郡縣續有分析復屬郡人汪翁儀唐
應徵陳遠等論次增輯列爲三十三目分禮樂射
御書數六集舊本因前有勞鉞序遂題爲成化志
非也

重修毘陵志四十卷

江蘇巡撫
採進本

明朱昱撰昱字懋易武進人初成化己丑常州知
府卓天錫聘昱修郡志書成未刻越十有三年戊

寅新淦孫仁來知府事仍屬昱增修之其書先圖
次表次志凡十有七門昱後序云以宋咸淳志爲
本次以洪武十年續志及永樂十六年景泰五年
勅天下郡縣纂輯志書之副稿按咸淳毘陵志爲
史能之撰洪武續志爲謝應芳撰其原書皆有體
例故所修比他志爲善惟命周忱賑荒以王恕爲
巡撫諸勅諭不專爲常州一府而牽連載之未免
失於汜濫云

三原縣志十六卷

兩淮馬裕
家藏本

明朱昱撰其書分類太繁例多叢脞如戶口列之食貨門參雜不倫縣治官制俱列之公署門亦綱目倒置人物分十七類甲科鄉貢封贈蔭叙悉隸焉而獨以顯達一類別爲一卷冠於前其識趣可知矣遠不及所修毘陵志也

徽州府志十二卷

兩淮馬裕家藏本

明汪舜民撰舜民婺源人成化乙未進士官至右副都御史巡撫鄖陽是書成於宏治壬戌分目過多如沿革之外又出郡名一門人物至分爲十四

類皆傷煩碎又風俗形勝二門皆標題夾註有似
類書亦乖體例

常州府志續集八卷

兩淮鹽政
採進本

明張愷撰愷無錫人成化甲辰進士仕履未詳初
王俟撰常州府志四十卷止於成化二十年此續
修之凡見於舊志者不錄其叙事止於正德七年
則其書當成於是歲後也江南通志載無錫張愷
常郡續志八卷與此本卷數相合其所載惟官署
人物蓋以沿革山川各門已載前志故也

吳邑志十六卷

浙江巡撫
採進本

明楊循吉撰循吉有蘇州府纂修識畧已著錄是
編成於嘉靖八年較他志乘爲典核然首叙吳國
本末爲史考已非一邑之事又引春秋所載吳事
爲經考又併非吳地之事矣仍不免志書牽引之
習也

常熟縣志四卷

兩淮馬裕
家藏本

明楊子器撰子器字名父慈谿人成化丁未進士
宏治中官常熟知縣因舊琴川志而葺之改題今

名卽其標目賢於舊志遠矣

赤城會通記二十卷

浙江范懋杜家天一閣藏本

明王啟撰啟號柏山黃巖人成化丁未進士官至
刑部尙書是編取陳耆卿赤城志謝鐸赤城續志
諸書彙爲一帙而變其體例自夏后氏迄明每朝
各爲一紀唐以後則一帝爲一紀其載官吏則分
名宦死難儒臣有事實官無事實官有疵官諸目
紀人物則分鄉獻死節孝子烈女鄉儻諸目散入
各紀之下又有異聞祠廟鄉試貢薦等目分析破

碎殊無體要至山川分野無可附麗則舉而列之
夏后氏紀亦可見其例之窒而難通矣

松江府志三十二卷

內府藏本

明顧清撰清字士廉華亭人宏治癸丑進士官至
南京禮部尙書事蹟具明史本傳其書頗詳悉有
體稍勝他輿記之冗濫

嘉靖江西通志三十七卷

兩淮鹽政採進本

明林庭棨周廣同撰庭棨字利瞻閩縣人宏治己
未進士官至工部尙書諡康懿事蹟附見明史林

瀚傳廣字充之崑山人宏治乙丑進士官至南京
刑部右侍郎事蹟具明史本傳是編乃嘉靖中庭
榻官江西布政司參政廣官按察司副使時所作
凡藩省志三卷諸府志三十四卷藩省志分十三
門諸府志分二十七門體例畧同他志惟姦宄一
門仿諸史姦臣酷吏傳例以示鑑戒獨爲小異史
載廣在正德中以劾錢寧獲罪幾死又載其平生
嚴冷無笑容巡撫江西墨吏皆望風而去其嫉惡
之嚴可以想見此門其廣所卬意歟

雍大記三十六卷

浙江汪啟淑家藏本

明何景明撰景明字仲默信陽人宏治壬戌進士官至陝西提學副使事蹟具明史文苑傳是編爲所作陝西總志乃其督學時開局立例召學官生徒分輯成編者訂改甫就景明以病去官僉事周宗化攝學政爲續成之始末具詳於段炅序中關中自三輔黃圖以後宋敏求程大昌所作最簡雅有法景明廣事蒐採意欲突過前人而嗜博務多如歷代史贊之類槩爲收入未免汜濫又文字多

摹古而失真如改沿革志曰考易改藝文志曰志
賁名目皆出臆創幾於鷗閣虬戶篠簞銑溪七子
末派爲世所詬厲亦有由矣

崇安縣志四卷

浙江范懋柱家
天一閣藏本

明李讓撰讓天台人官崇安訓導書未有宏治癸
亥崇安縣丞錢塘沈相刻書跋而科第門中所載
乃至正德十四年己卯蓋書成之後又有所續附
也其書凡分五十七門猥雜殊甚卷首列諸儒圖
像自胡安國以下凡十六人皆畧具眉目不可別

爲某某僅以題識辨姓名不知何取與建陽縣志

所繪同一鄙陋也

彰德府志八卷

兩淮馬裕
家藏本

明崔銑撰銑有讀易餘言已著錄是書成於嘉靖
壬午自序謂本宋相臺志元相臺續志而益以諸
縣之興記其書頗爲謹嚴蓋銑本儒者故也

嘉靖惟揚志三十八卷

浙江范懋柱家
天一閣藏本

明盛儀撰儀字德章江都人宏治乙丑進士官至
太僕寺卿揚州輿記宋代有紹熙廣陵志嘉泰廣

陵志寶祐惟揚志歲久散佚高宗本有惟揚新志而採錄未備嘉靖二十年知府歸安朱懷幹請於巡按御史胡植屬儀輯爲是書沿寶祐舊名以惟揚爲稱且謂禹貢淮海惟揚州寶祐志本此今作維揚者誤也首郡邑古今圖次建革以下十八志又秩官人物二列傳纂次頗有端緒在明代地志中差爲完善惟以古今關涉揚州事蹟仿綱目編年紀載別爲厯代一志則體例殊嫌掇造

嘉興志補十二卷

浙江巡撫
採進本

明鄒衡撰衡嘉善人初宋嘉定甲戌岳珂守嘉禾
始命闕杞創郡志未成元至元間郡博士徐碩續
爲三十二卷明宏治中郡守柳邦用再加纂輯衡
復取宋元諸志增所未備其已見於柳志者不錄
故謂之志補書成於正德元年卷首並載徐碩舊
志唐天麟郭晦二人序蓋欲表舊志義例故存其
原序以見端末也

嘉靖安慶府志三十卷

兩淮鹽政
採進本

明胡纘宗撰纘宗字世甫自號烏鼠山人泰安人

正德戊辰進士官至左副都御史巡撫河南事蹟
附見明史劉訥傳是編乃嘉靖元年纘宗爲安慶
知府時所作爲記二表二志十二傳十二不分細
目其門人王漢序之曰今郡縣志分門立類撮要
標目爲類書之體而非史之例是志一循古文無
復分門立類規規也然第四卷已作職官表第七
卷又作職官志則於例亦頗不純又顧炎武曰知
錄曰胡纘宗作安慶府志於正德中劉七事大書
曰七年閏五月賊七來寇江境而分註於賊七之

下曰姓劉氏舉以示人無不笑之不知近日之學
爲秦漢文者皆賊七之類也是亦好古之過矣

嘉靖廣信府志二十卷

兩淮鹽政
採進本

明費臬撰臬字子和鉛山人正德辛未進士官至
禮部尙書事蹟附見明史費宏傳廣信自成化初
始有志嘉靖乙酉臬以編修家居與同郡江汝璧
楊麟等增修此本凡八門

正德大同府志十八卷

兩淮鹽政
採進本

明張欽撰欽字敬之號心齋正德辛未進士官至

工部左侍郎太學題名碑作通州衛人而此書自署曰潞郡蓋通州爲潞河所經也事蹟具明史本傳是編乃正德癸酉欽官行人奉使代藩時所作凡四十門其沿革門紀大同晉置始興郡後魏徙都平城不知北魏始爲新興至天興中乃徙平城山川門白帝山祇載白登臺爲古蹟不知白登有繁峙宮室武廟諸蹟載於水經注及通典者甚詳又黃河在大同廢東勝州南八里自榆林北塞經此乃折而南書中僅云自東勝界南流至太原往

往失之舛畧蓋邊地少書又倉卒脫稿故也其別
立烽堠一門又卷首圖說中有車營戰車諸圖爲
他志書所無之例蓋大同在明代爲巖邊故尤詳
於武備云

商畧

無卷數 浙江范懋
柱家天一閣藏本

明任慶雲撰慶雲商州人正德癸酉舉人官至陝
州知州其書首州志次鎮安洛南山陽商南四邑
志各分地理建置學校典禮官師選舉人士雜述
八門目錄之前有題詞曰今之郡邑古之國也國

可以言語言策郡邑不可以言紀故言畧蓋本之
華嶠若文選之典引云爾然國語國策原非地志
班固典引亦符命之流引類殊爲紕繆至於華嶠
曰畧語出史通亦史志之別名非地志之名也則
其書可知矣

澈浦續志九卷

浙江巡撫
採進本

明董穀撰穀字碩甫正德丙子舉人官安義漢陽
二縣知縣罷官後自號碧里山樵又曰漢陽歸叟
居海鹽之澈水鎮嘗得朱常棠澈水舊志校而刊

之因採元明事蹟續成此編小變棠之體例分地理職官公署貢賦兵衛祠宇人品雜記藝文九門規矩在前弗能侷錯較他邑志之冗濫尙有典型然能知棠書之善而必欲改絃易轍稍出入之猶不免明人自用之習故精簡古雅亦終不逮棠書焉

金陵古今圖考

無卷數 浙江范懋桂家天一閣藏本

明陳沂撰沂有維楨錄已著錄是編紀金陵建置自列國以迄明代爲圖一十有五又以城郭規制

隨世異態復作互見圖以辨之每圖並附有說首
有正德丙子自序

金陵世紀四卷

浙江范懋柱家天一閣藏本

明陳沂撰分都邑城郭宮闕郊廟官署離泮衙市
第宅樓宇山川驛路津梁臺苑陵墓祠祀寺觀識
遺賦咏十八門粗具大畧不爲詳贍沂金陵古今
圖考乃未登第時所作後官翰林侍講時乃續爲
此書隆慶中太僕少卿史際始刊之

隨志二卷

安徽巡撫採進本

明顏木撰木字維喬應山人正德丁丑進士官亳州知州明史文苑傳附見王廷陳傳末是志乃木罷歸後隨州知州蓬溪任德屬木所作上卷編年紀事始自義皇迄於明代下卷皆錄詩文雖以隨志爲名而木籍隸應山與隨接壤志中所載皆合二邑收之其編年之例全仿春秋經文稱隨爲我而以地之沿革官之遷除士之中鄉會試貢太學者按年紀載皆地志未有之例也史稱嘉靖十八年詔修承天大志巡撫顧璘以王廷陳顏木王格

薦書成不稱旨賜銀幣而已其書今未之見觀於是志亦約畧可知矣

陝西志三十卷

兩淮鹽政
採進本

明伍餘福撰餘福字天錫臨川人正德丁丑進士官陝西按察司副使是編成於成化乙未以府州縣衛所寺監爲綱而各繫門目於其下如一統志之例陝西爲古都會地舊蹟頗多金石尤富諸書記載頗詳其所採摭尙未能詳備

浦江志畧八卷

浙江汪啟淑家藏本

明毛鳳韶撰鳳韶字瑞成麻城人正德辛巳進士官至雲南按察司僉事是編乃嘉靖丙戌鳳韶爲浦江知縣時所作分疆域民物官守城社財賦學校人物雜志八門又分子目四十有五較他志頗爲簡質而大旨欲仿通鑑綱目以名字爵謚爲褒貶又仿尹起莘例自爲發明而散署邑人之名已非志體至於正傳之外間有附錄自云仿春秋大全不知春秋大全何與志書之例蓋明之中葉士大夫已如是之陋矣

嘉靖廣西通志六十卷

兩淮鹽政
採進本

明黃佐撰林富參修佐有泰泉鄉禮已著錄富甫
田人宏治壬戌進士官至兵部侍郎兼僉都御史
總理兩廣是編凡圖經二卷表八卷志三十卷列
傳九卷外紀十一卷大致頗謹嚴其沿革分野職
官選舉皆作表以省簡牘體例亦善惟士官已隸
職方命以爵秩而列之外紀非大一統之義寺觀
亦列外紀云闕異端然仙釋則入之列傳中不外
其人而外其人之所居俟矣藝文苟無闕於土風

則可不錄既以其有關錄之而列之於外紀中尤不允也

山東通志四十卷

兩淮鹽政
採進本

明陸鈺撰按明有兩陸鈺其一崑山人見明史文苑傳此陸鈺字舉之號少石子鄞縣人正德辛巳進士官至山東提學副使與其兄銓並附見明史王慎中傳是編在地志之中號爲佳本體例不務新奇而詳核有法惟海市常變圖稍嫌枝蔓幻化無定之形豈繪畫所可該括耶

